

湖海樓詞集

冊六

湖海樓詞集卷二十六

宜興陳維崧其年著

弟 維岳緯雲 參閱

選

男履端

校

姪賜薛

丹鳳吟

送別友人和雲臣韻

細數頻年游處舞榭鶯梳歌筵燕掠墊巾側帽雙倚
東風院落簾紋新染水烟小定更憶溪邊畫橈斜閣
似夢如塵情緒事去凝思花影還簌牆角 今夜陽
關怕唱玉樽潏灑持旋却若到無諸國有連天嘶馬
匝樹飛鵲輕紅荔子籠徧戈船綃幕我在江南殘照
裏只行踪樂託武夷回首倘依然念着

輪臺子

采菱

別浦蓮歌乍歇又棹入菱潭深窅西風亂水瀾瀾斜

日遠帆了了小娃蘭槩齊開鬪雲英一色裙波裊纔
低珠腕又弱蔓柔莖將人繞何愁角刺藤兜把千
頃水烟暗昏羨清芬較菰米荷房一般幽悄語折芰
隣船再來須早怕明日寒塘剩白蘋紅蓼櫓聲幽驚
飛渚鳥笑盈盈併摘花歸可許粧臺照

入歸

二月十一夜風月甚佳過水繪園聽諸郎絃
管燈下因遣家信淒然不成一字賦此以

寄閨人

彈得絃清飄來笛脆曲室諸郎歌管他鄉風月佳無
比只是中年以後心情頓嬾遙憶故園粧閣上鎮玉
臂雲鬟淒淒斷傷心處何事尊前聽一聲河滿却是
絳河欲沒珠繩乍轉畫角譙樓哀怨舊事如塵新愁
似夢可惜一場分散奈天涯滋味瞞不過南歸魚鴈
吮霜毫纔提還倦莫慮春寒羅襟紅淚煖

秋夜婦病吳門遂不成行賦此寫懷

藥烟裊罷爐灰畫盡城上戍火半滅去年記入西風

候曾也瘦人如菊秋衾勝鐵差喜而今身較健奈婦
病吟聲酸切惹一派繞砌啼蛩怨苦替人說 准擬
楓林蟹舍霜蓬霧縠去弄烟波寥泚秋當濃處月將
圓夜擁櫂沉吟旋輟算不如春裏雨雨風風過時節
偏逢着五湖霽景萬斛晴光洞庭秋噴雪

春夜偶成

城陰水際閒尋往事光景零亂難寫畫眉橋北沿牆
去曾有迷藏伴侶簸錢亭榭生小誰忺鉛共粉說不
盡衣裳淡雅碧檻外蠻柳絲絲甸線恍如畫 今日
延秋坊畔令狐宅裏依舊好花開也杏梁燕子玉籠
鸚鵡尚說十年前話水晶箱子在遮莫還存聖檀帕
東風起櫻桃細落糝上當初鞦韆紅粉架

杜家廟距濟南四十五里有旅館頗幽靚砌
下玉簪一叢尤楚楚可念徙倚久之詞以
寫懷

鞭絲小弄征塵輕浥雲水一片寥廓涼橋卸馱聊停
憩遙送明湖趵突爽氣森薄小閣矮窗新粉壁更繞

砌疎枝幽萼背立處暗省花名瑣事頓縈着
惆悵臨行那夜低鬟偏髻惜別心情如昨側門迴盼倚闌
人在扶定腰身纖弱嘆萍踪一霎峽雨湘烟楚天各
思量煞瓊釵滑膩枕畔朦朧三更和笑落

賀新郎

雲郎合卺爲賦此詞

小酌醺醺釀喜今朝釵光簾影燈前滉漾隔着屏風
喧笑語報道雀翹初上又悄把檀奴偷相撲朔雌雄
渾不辨但臨風私取春弓量送爾去揭鴛帳
六年孤館相依傍最難忘紅蕤枕畔淚花輕颺了爾一生
花燭事宛轉婦隨夫唱弩力做藁砧模樣只我羅衾
渾似鐵擁桃笙難得紗窗亮休爲我再惆悵

賀阮亭三十

牛馬江東走陪滿座鄒枝上客爲君稱壽七葉貂蟬
連鳳闕坐擁銀箏翠袖又兄弟才雄八斗三十王郎
年正少恰黃金鑄印雙懸肘此意氣古無有
淡黃十里隋堤柳更多少竹西歌吹樊川詩酒滿目關山

原不惡只是繁華非舊算惟有文章不朽簌簌珠簾人不捲看使君燈火春城口依稀羨歐陽守

瓜步與姜子翥

佛狸祠下別看此處江花如練江烟似織憶昔結交
堅戴笠江左周郎英發正爛醉金釵之側宋玉右之
計倪甫草俱大俠更潁川年少風流客仰天嘯冠纓
絕十年往事同陳蹟恰傳聞洛陽金盡櫟陽獄急
一日二桃疑盡釋廣柳車中人出又買得如花小妾
送客驚心千萬里但銷魂此際真愁絕吾自有蒯通
舌

甲辰廣陵中秋小飲孫豹人漑堂歸歌示阮

亭

把酒狂歌起正天上琉璃萬頃月華如水下有長江
流不盡多少殘山剩壘誰說道英雄竟死一聽秦箏
人已醉恨月明恰照吾衰矣城樓點打不止當年
此夜吳趨裏有無數紅牙金縷明眸皓齒笑作鎮西
鸚鵡舞眼底何知程李詎今日一寒至此明月無情

蟬髻去且五湖歸伴魚竿耳知我者阮亭子

月夜看梅花

皓魄光微綠喜東風瓊枝璧月清輝眾覩顧影娉婷
無一語吳女纖腰初束斜倚在珠闌曲曲看到夜深
風露冷浸簷前一片圓圓玉吾醉矣共花宿愁腸
被酒還相觸且狂歌莫言興盡再斟醺醺忽憶開元
當日事中有梅妃蛾綠何必羨玉奴新浴可惜樓東
三十樹雨霖鈴都做連昌竹花應歎睡難足

乙巳端午寄友用劉潛夫韻

醉凭闌干吐倚清狂橫陳冰簟後堂無暑聞說吳兒
工作劇弔屈龍舟似虎我欲唱公乎無渡纍自沉湘
卿底急枉教人搗碎迴颿鼓楚江畔葦花舞陡然
魂磊多如許喚喚靈均前來共語醉君椒醕呵壁荒唐
何必問死累人間角黍尚不及伍胥濤怒忽發狂言
驚滿座料諸公知我心中苦酒醒後重懷古

爲冒君苗催粧

遲日嬌鶯轉簸輕風半欄芍藥參差人面珠絡流蘇

犀壓角十里龍綃微捲料好夢一春曾選節近菖蒲
喧笑語借五絲先做同心纏畫梁上乳雙燕 笙歌
沸處蓮籌轉剪銀燈紅酥檀暈暗窺韓掾小弟陸家
工贈婦春蚓花箋蟠徧何況是丹青能擅百種烟巒
俱易畫遠山眉第一須葱蒨看小試君苗硯

作家書竟題范龍仙書齋壁上蘆鴈圖

漏悄裁書罷繞廊行偶然瞥見壁間古畫一派蘆花
江岸上白鴈濛濛欲下有立且飛而鳴者萬里重關
歸夢杳拍寒汀絮盡傷心話捱不了淒涼夜 城頭
戍鼓剛三打正四壁人聲都靜月華如瀉再向丹青
移燭認水墨陰陰入化恍嘹唳枕稜牕罅曾在孤舟
逢此景便畫圖相對心猶怕君莫向高齋掛

丁未五日程崑崙別駕招同談長益何雍南

石崖程千一金山看競渡

一鼓魚龍急看滔滔妙高臺下乾坤噓吸彷彿雲旗
和翠蓋貝闕鱗堂齊葺料此際百靈都集十萬黃頭
皆突鬢挽湘纍今夜誰先及有人在江潭泣 吳兒

拖尾飄紅褶但迴颿水雲颿處翻身徑入不鬪黃金
惟鬪捷江水駭時欲立惹商婦銀箏聲澁一霎悲歡
纔過眼漸日斜桂檝紛收拾山如睡黛還濕

賀程崑崙生日并送其之任皖城五月十四

日

榴子紅如綉正綺席吳鹽下致金盤雪藕七載南徐
揮羽扇肘後黃金似斗北固外晴江夜走留取臂間
長命縷算節過五日剛踰九重爲我先生壽遷官
況在懸弧後看他日郡庭一望匡廬湓口今古量才
惟一石公也文章不朽詎更歎一麾出守還擬樅陽
城下過獻新詞再進當筵酒公倘許狂生否

秋夜呈芝麓先生

擲帽悲歌發正倚幌孤秋獨眺鳳城雙闕一片玉河
橋下水宛轉玲瓏如雪其上有秦時明月我在京華
淪落久恨吳鹽只點愁人髮家何在在天末憑高
對景心俱折關情處燕昭樂毅一時人物白鴈橫天
如箭叫叫盡古今豪傑都只被江山磨滅明到無終

山下去拓弓弦渴飲黃塵血長楊賦竟何益

俊鶻無聲攫羨一代詞場老手舍公安託歌到陽關
剛再疊月裏斜飛兔脚簾以外秋星作作我得公詞
行且讀任侏儒飽飯嘲臣朔大笑絕冠纓索 中朝
司馬麒麟閣籌邊暇南樓愛挽書生酬酢半世顛狂
誰念我多少五陵輕薄我有淚只爲公落後夜月明
知更好好問陸郎舞態應如昨肯爲奏軍中樂

送邵蘭雪歸吳門仍用前韻

易水嚴裝發休回首故人別酒帝城高闕九曲黃河
迎馬首森森龍宮堆雪流不盡天涯白月君去故侯
瓜可種向西風莫短衝冠髮人世事總毫末 長洲
鹿走蘇臺折數年少當歌不醉此非俊物試到吳東
門下問可有吹簫人傑有亦被怒潮磨滅來夜天街
無酒伴怕離鴻叫得楓成血亦歸耳住何益

題沙介臣詞并柬周翼微郁東堂二子仍用

前韻

健筆森拏攫自古道才人無命英雄有託黃歇墳前

軍鼓動萬弩攢平陣脚從此後哀鴻競作索米長安
非失策看掀髯意氣雄河朔荆高輩未蕭索 鶯花
麗句傳三閣更旅舍同時二妙和歌相酢硬箭軟裘
推勁敵爽氣毫端噴薄乍出手雙雕都落我去諸公
應憶我記風前紅燭燒如昨息壤在速行樂

秋夜飲錢宮聲寓中示譚舟石周子俶李西
淵章素文仍用前韻

故態狂奴發君莫學車中新婦口中石闕同是天涯
流落者休使滿頭霜雪且斜抱琵琶彎月聽到鈿蟬
淒厲處更突如鐵騎纖如髮秋聲起在林末 三更
銀甲都彈折不須問千年宮殿幾番人物記得館娃
人似玉喚作平康之傑曾遇在蘭膏將滅萬事古來
誰最苦只青衫淚與榴裙血鷄未啜酒須益時偶及
吳門王姬姬時已落籍矣

秋日行西苑仍用前韻

太液秋鯨攫紅蓼底龍舟鳳艚沿流依託記得橫汾
雄漢武月夜波心殿脚又玉管金簫間作十二雲房

都已閉只將軍綠犬誇平朔何處覓鞦韆索 行人
斜過梳粧閣入耳有菱歌鴈陣冷冷酬酢自惜書生
難得見天上桂叢蘭薄單一派秋荷零落且拉車前
騶卒飲對西風莫歎今非昨依稀奏還宮樂是日聖
駕從南苑還宮

秋夜對月示弟緯雲仍用前韻

戍鼓城樓發問客裏冰輪炤我幾番圓闕一片銀河
天外落光映千門如雪總則是漢宮明月試上麒麟
枯冢望問誰人紅粉誰黃髮風乍吼青蘋末 應侯
有脇憑他折但歌罷仰天裂眼識卿何物窮矣男兒
方失路複壁誰藏英傑拚潦倒身名灰滅細聽秋林
都颯颯只沙場斷鏃陰磷血良太苦竟何益

題郁東堂詞仍用前韻

龍爪槐張攬馳突處宛駟蹴鐵死生堪託我把金荃
詞一卷字字寫成釵脚是吾友東堂之作讀罷悲風
生肘腋羨君才不減王寧朔相憐也總蕭索 茂陵
一病成擔閣歎客裏無多暇日我歌君酢醉擘銀箏

彈一曲彈到秋雲都薄只是訴兩人淪落泣下羞爲
兒女態問吾生舌在還如昨休作苦且行樂

席上呈芝麓先生

打鼓船將發看水面怒濤似屋巨魚如闕一路推篷
吹笛去無數葦花搖雪忘不了朱門皓月萬里沙昏
聞鴈叫料孤眠白盡離人髮回首望謝家未時緯雲
尚留都下西風衰柳還堪折喜筵上紅牙銀燭他
無長物話到英雄方矢志老鶻飛來傑傑又一半疎
星明滅歸去焚書應學劍愛風毛雨遍千山血益智
粽竟何益

將之中州留別芝麓先生

匹馬衝寒發看滿目殘山剩水轅轅伊闕我到關河
驚歲暮却值梁園飛雪不須怨汴京烟月歌罷添衣
仍命酒只今宵離恨多於髮男兒事有本末 珊瑚
十丈憑敲折數世上非公知我幾成怪物此外半生
誰鮑子負此真非豪傑最感是留髡燭滅後夜相思
銅雀下想漳河水染啼痕血今不醉後何益

獸炭簾衣攬華筵散此身飲罷茫茫安託我有小秦
王一曲吹到城頭牆脚今日事何人所作漫對西風
增感慨且臂鷹躍馬游河朔功名志總蕭索橫刀
難上凌烟閣吾且與老兵健卒悲歌酬酢曾記睢陽
添賊火萬弩圍城肉薄烽一點陸渾山落轉眼平臺
風物好喜笙歌宛維人猶昨不思蜀此間樂

贈程穆倩時年六十

痛飲蕪城夜喜春秋甫當六十詞場雄霸跋短歌
歌自壽幻作蟲言變化是慢戲滑稽之亞穆倩自壽
作木蘭花慢四首中皆爲虫言蟲達封侯何必問喚
蟲蟲小語飄檀麝君擊缶吾行炙四筵安坐爭相
詫算絕藝非花薑尾古來無價牽率老夫兒子五索
笑挽鬚燈下論此樂勝於僕射有酒且沽澆磊塊任
無錢也向壚頭貰休辭醉先生詐

徐竹逸招同幾士兄閣上看梅

一樹都如雪君不見尊前有客歌聲辛切醉倚花魂
花欲語花似笑人愁絕我一語亦爲花說人旣多愁

人已瘦問花何瘦亦隨人折相看處酒休竭
臨風細取花重閱羨物外孤高簡傲花中豪傑恆怪世人
輕比並浪道檀腮粉頰渾不稱此花風骨我欲擬之
銀作鎧趁月明浴盡三軍鐵神還似史遷潔

爲徐晉遺催粧時十二月初八夜大雪

雙綰同心結喜今夜新人二九殘年臘八幾隊紗籠
徐引導光漾黃金跳脫何況是玉人如月小捉養娘
簾底問問徐公城北人爭說燈下看果英發
天公更自風流絕響瓊籤且煩青女細飄珂雪爲驗謝娘
才調好故把吳鹽輕撒不須慮銅輿街滑我識李謩
吹笛手但今宵鳳竹休頻壓枕函上印紅頰

都門洗象詞同緯雲弟賦

百戲魚龍聚晝陰陰雲房冰洞帝城無暑日晡波心
張水幄列坐徹侯公主其外有傾城士女少頃蠻奴
乘象至整鞭梢踏入金塘去喧阗甚爾何怒
鼻殷捲盡西山雨看水面濤飛海立銀傾雪注猶記昆明
傳象戰柝馬嘶僅跋扈今已慶太平寰宇浴罷含元

宣立仗望赭袍一朵紅雲吐率百獸御階舞

見南苑阱熊而歎之同吳天石賦

南苑花如綉見一帶長楊虎圈咆哮百獸此物係然
餘猛氣攀檻時時欲吼像鐵騎金戈馳驟可惜當熊
人去杳鎖宮槐冷落黃金鬣誰侍奉金門帚 爛羊
都尉通侯狗但驍雄偏嗟失勢所遭不偶猶記深山
騰蹕日獅子猊兒爲友追險怪曾踰宇宙此日草間
狐兔盡束身歸五柞同猿狖蹠已落宰夫手

季滄葦侍御廣陵納姬爲賦花燭詞

螺子眉峯滴遙想像文窗冉冉積鬟的的誰遣朝天
青雀舫小泊烟江水驛夾岸有鈿車畫戟日至尚遲
添一線恰宵長更照團圓月時仲冬十五夜爲長至
前十日月影底人兒出 仙郎況是文章伯人都羨
金閨華彥玉清仙籍盡道臺霜行峽雨先把鵷鷺冠
摘纔卸到紅巾冪歷今夜當關須記取對府中烏與
隣鷄說休相攪恣憐惜

汝州月夜被酒感懷董二

今夜清輝苦真醉矣人生有幾關山如許極目海天
渾一碧回首家鄉何處總則是年年羈旅脫帽凭闌
何限恨倚風前細把寒更數誰更打嚴城鼓無端
忽憶疎狂侶曾記得烏衣巷口別來如雨明月也知
千里共炤盡秦樓楚戍應漸到故人黃土只恐白楊
和月冷比人間更有銷魂處汝河水白如乳

登龍池絕頂憑虛閣同雲臣遠公賦

極目真空闊倚巉巖層巒競瘦老松都活瀕洞荒寒
非世境昏曉陰陽盪割更古木冷烟轆轤虎跡龍湫
經過了一枝筇幾被罡風奪纔到得亂峯末峯巔
小閣危堪掇嵌嵌欹欹呀然如竇拳然如鉢只怕石欄
憑不穩敗葉欲隨秋脫况恰對崖門初豁我愛湖光
能入望約他年再與攀蘿葛看夜半陽鳥渴

蘧庵先生五日有魚酒之餉醉後填詞

蒲酒濃如乳更爲我東溟斫鱸大魚就脯攜酒石榴
花下醉還選腹腴親煮耳熱也休提今古只有寒潮
圍故國歎龍舟寂寞無尋處風乍起瘦蛟舞何須